



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym TAPAK 8

Taruba Lok Sabha election nung Rahul Gandhi-i Amethi nungi tokteptsü

India tsür asemteper Dutee Chand küm pezü atema nokdanger



VOL. XX NO. 307 (ADOK 307) DIMAPUR

KÜPTOKNÜ (SATURDAY)

LUROI (AUGUST) 19, 2023

₹ 5.00

## Chiyungtsü yanglurtem dang metetdaksür

**Dimapur, August 18, 2023 (DIPR):** Health and Family Welfare Department-i Nagaland nung Food Business Operators (FBOs) dang FSSAI License/Registration Certificate renew asütsü metetdaksüogo.

Iba ya Food Safety and Standards (Licensing & Registration of Food Businesses) Regulations, 2011 nung lateta aliba ama lir aser yimtsüng aser jila nung aliba FBOs ajak adener ta parnokisa ashi.

October 31, 2023 matongdang website <https://foscos.fssai.gov.in> nung FSSAI License/Registration Certificate renew asütsü ta department-isa metetdaksüogo.

Chiyungtsü dak sendakba shishilembar ajak Safety &

Standards Authority (FSS) Act, 2006 kübok register asütsüla aser FSSAI License/Registration certificate angutsüla ta H&FW department-i nenshia metetdaksüogo.

FSS Act, 2006 nung section 63 aser section 31 kübok iba mapa meinyakertem Rs. 5 lakh tashi senchi den ita 6 tashi tepuokdak ayutsü akok ta parnokisa ashi.

FBOs nung adenertem- food and dietary supplements stockists, food or health supplement vendors, home-based manufacturers, hostel mess facilities, office/private canteens, street food vendors, meat and vegetable vendors, manufacturers, distributors/wholesalers, suppliers, retailers, hotels, restaurants, & resorts.

## Tiyazü video yanglur prokshir: NSCN-IM

**Dimapur, August 18, 2023 (Agencies):** Naga Army kati Manipur nung telungpurtem nem prangpong-injang ayok ta ashibaji tiyazü ta NSCN-IM-i metetdaksüogo.

NSCN-IM züngsem kati video ka nung Meitei telungpur telok ka dang AK prangpong dena prangpong-injang yokogo ta ashir.

Iba video nung aliba nisung ya Sirong village, Spmth region nungi H Khosiivei Lovingson Roah ta jangjaogo.

Yaküm October 12 nung Roah-i NSCN-IM nung züngsem aküm aser taküm küm tetenzüklen basic military training agia liasü. Pa ya Thungbo Brigade, Naga Army nug private ka ama mapa lemzüksü ta NSCN-IM-i sangdong ka nung metetdaksü.

August 7 nü pa tenarong nung timtem ka aliba atema medical leave agütsü aser Dimapur-i yok. Iba anogo nungi pa samadok aser

video nung ang angu ta NSCN-IM-isa sangdong nung shia lir.

“Pa ya taitüsü aketba nisung ka, teti tiyazü jembar ka aser sepai ka asütsü metemtsü ta pa indang commander-i shiogo. Iba video clip nung ya tasa tamajung ka lir ta nisung mashii kati shitettsü” ta NSCN-IM-isa metetdaksü.

“Iba video ya jelia tasa atonger yangluba lir aser kin o kin tsüngda mangatetep adokdaksütsü atema inyakba mapa ka. Iba video ya NSCN tenüng menüksütsü atema yangluba lir. Leave nung aliba private sepai kati prangpong-injang yokdok ta asüba nung tamangtsü kecha mali” ta parnokisa ashi.

Iba video nung NSCN-IM züngsem yagi pa ya Pomei Naga Army (2015 batch) nungi corporal ka ta ashir.

Iba video ya sepaitemi agiba mesüka angur aser Rs 10,00,000 - Rs 15,00,000 tsüngda agi prangpong 5 yokdok ta pai ashir.

## NE nung tzünglu kanga arutsü: IMD

**Guwahati, August 18, 2023 (Agencies):** India Meteorological Department (IMD)-i Hokolbarn Northeast state tem nung taruba anogo pungu tzünglu arutsü metetdaksüogo.

Himalayan tenemtsünglen nungi Bay of Bengal tashi Monsoon Trough lir aser iba ajanga West Bengal o Odisha zükümlen tzünglu kanga arutsü ta Ministry of Earth Sciences, IMD-i metetdaksü.

Tsüngsang-mopung:

Anogo 1: Nagaland, Manipur, Mizoram aser Tripura nung tzünglu aika arutsü aser Arunachal Pradesh, Assam o

Meghalaya nung terara arutsü.

Anogo 2-5: Arunachal Pradesh, Assam, Meghalaya, Nagaland, Manipur, Mizoram aser Tripura nung tzünglu maneni arutsü.

Tekümdangtsü:

Anogo 1: Assam, Meghalaya, Nagaland, Manipur, Mizoram aser Tripura nung tsüngmok aser tsüngi süitsü akok. Arunachal Pradesh, Assam, Meghalaya, Nagaland, Manipur aser Mizoram nung tzünglu kanga arutsü.

Anogo 2-5: Arunachal Pradesh, Assam, Meghalaya, Nagaland aser Manipur nung tzünglu kanga arutsü.

## Temang nung mokokmein alir asoshi bilemetsüla

**Kohima, August 18, 2023 (TYO):** Meimchir ka tiptema senzügenbongsüba ya temeten ka lir anungji NPWD-i Nagaland nung sorkar kiojen aser tesem ajak nung PwDs senzütetsüsa yanglutsüla ta Nagaland State Commissioner for Persons with Disabilities (SCPWD), Diethono Nakhro-i ashi.

Hokolbarnü Nagaland Public Works Department (NPWD) atema Rights of Persons with Disabilities indang workshop ka agidang Diethono Nakhro-i iba ya metetdaksü.

2019 nung Nagaland Public Works Department (NPWD) aser Social Welfare Department

ajanga tetuyubatem agüjaka PwDs-i sorkar kiojentem aser public tesemtem nung timtem ajurur, ta lai ashi.

“Temang nung mokokmein alirtem senzüka meyutsütsüla. Mokokmein alirtem asoshi bilemja inyaksüla” ta Nakhro-isa ashi.

Ki tasentem nung accessibility requirements peria yangluba sülen ang NOC mesüra certification of completion agütsütsüla. Sorkar kiojentem aser public tesem aika nung mokokmein alirtem mesenzüteter anungji nisung ajak nem kasa maongka agütsütsüla, ta Nakhro-isa ashi.

Tawa Police Complex Chumoukedima nung lapokba VVIP Guest House aser Chief Minister’s Official residential complex nung PwDs timtem ajurur, ta laisa ashi. Iba sentong nung NSCPWD Legal Consultants- Khriesinuo Kire aser Asenla Walling nati Harmonised Guidelines & Standards for Universal Accessibility in India 2021 indang jembi.

Sentong nung Chief Engineer PWD (Housing) Hozheto Shikhu menden liasü, Engineer-in-Chief Pukroneizo Kera-i tesentepertem pelaa agizük aser Senior Legal Advisor NPWD Temsu Soyah-i anküp tepela o jembi.

## H&FW department-i mapa tajung aika inyaktetogo: Kikheto Sema

**Dimapur, August 18, 2023 (DIPR):** Health & Family Welfare Commissioner & Secretary Kikheto Sema-i Department nung ketdangsür ajak dang pelaba metetdaksüogo.

Department nung ita 8 tashi Commissioner & Secretary inyaka arudang amalitepa inyakba ajanga mapa tajung aika inyaktetogo ta Kikheto-i ashi.

Mapang tatsüka tsüngda inyaktetbatem rongnung District Hospital ajak nung Rs.35 crore jenjang 10 Bed ICU project takok ngua inyakba lir ta pai ashi.

Iba mapa ya eGov Foundation aser California, USA

nungi Vinod Khosla, Chairman UIDAI Nandan Nilekani aser 10 Bed ICU Project Chairman Srikanth Nadhamuni nungertemi yariba ajanga inyaktet.

Maneni, District Hospital ajak nem HIV & AIDS testing atema Mobile ICTC Vans 12 lema agütsü. Iba mapa ya National AIDS Control Organization (NACO), Government of India Director General den yaritepa inyak. Ano NHAK nung HIV Viral Load Lab lapokba ajanga tangaleni blood samples bener yokba tayongzükba koktetogo ta Kikheto Sema-i metetdaksü.

Mapang tatsüka inyaktetog sorkar aser nija mozü ki ajak aser school tem “No Tobacco Zones”

sangdongogo aser district aika nung Food Testing Laboratory tem amenokogo, ta paisa ashi.

Maneni 30 Bedded Ayush Hospitals ana den September 2023 nungi Medical College lapoktsü lir. Nagaland asoshi MBBS, BDS aser tanga medical seats aika anguba ya department-i inyaktetba mapa tajung rongnung ka lir ta Kikheto-isa metetdaksü.

Nagaland chief minister Neiphiu Rio, taoba H&FW Minister S. Pangnyu Phom, tang teinyakdak H&FW Minister P. Paiwang Konyak aser H&FW ketdangsürtem den staff ajak dang kanga pelar ta paisa shisem.

## Manipur nung Kuki village volunteers 3 tepsetba aitsür

**Imphal, August 18, 2023 (Agencies):** August 18 nü Kamjong district kübok Thawai nung Kuki village volunteers asem khasetba aitsür ta Kangpokpi District nung aliba Kuki-Zo nungeri metetdaksü.

Kangpokpi district nungi tetsür noklang aika adenshir National Highway-2 mokdanga lungkak ait.

Parnoki “We Want Justice”, “We Want Assam Rifles”, “We Want AFSPA” yimym ayima lungkak aitogo.

“Manipur chief minister-i Indian Independence Day nung tatok agütsütsü aser amadoktsü aser akhi ama yimjung nung alitsü tayongzükba agütsüba sülen Kuki-Zo village volunteers asem tepsetba ajanga par nisungtemi pa ashi mangaba sayur. Anungji pai Chief Minister inyaksü temsüa mali” ta lungkak aitba tetsür kati ashi.

Centre-i Manipur nung mapa inyaksüla aser tai maketba Thawai yimdakilir asem nem

temeten agütsütsüla. Centre-i Manipur nung tekaratiba nung AFSPA benoktsüla ta lungkak aiteremi takhangba agütsü.

Committee on Tribal Committee (CoTU)-ia Thawai Kuki Village amakba aitsüogo. Tasür asemji Jamkhogin Haokip (35), Thangkhokai Haokip (31) aser Hollenson Baite (21) nunger liasü ta CoTU Media Cell Coordinator, Ng. Lun Kipgen-i ashi.

Meira Paibi nunger dena Meitei nungeri akhangba ama Litan tesem nungi Assam Rifles agienba sülen iba lendong atalokogo ta Kipgen-isa ashi.

“Onoki Litan dena arrtsü ajaklen Assam Rifles mapa lemzüksütsü akhanger. Yamaji asü nung dang Thawai Kuki aser tanga Kuki-Zo yimtsüngtem lendong nungi kümzüka ayutsü” ta paisa metetdaksü.

Committee on Tribal Unity (CoTU)-isa India sorkar dang Manipur nung lendenlen aliba district ajak nung Arms Forces

Special Power Act (AFSPA) benoktsü takhangba agütsüogo.

Külen, Kuki Inpi Manipur-ia Hokolbarnep Thawai Kuki village nung Kuki Village Volunteers asem tepsetba atema temlung raksaba metetdaksüogo.

Tasütait nisung asemi Meitei kiralongrar dang nungi parnok yimtsüng kümzüka ayudang taküm bendanga agütsü ta KIM Information and Publicity Secretary, Janghaolun Haokip-i ashi.

Kuki nunger yimten latettsü atema takhangba agütsüba anema Meitei nungeri state sorkar aser Meira Paibis, Arambai Tenggol, Meetei Leepun teloktem den yaritepa Kuki nunger anema inyaker, ta paisa metetdaksü.

“Tanü tapayutsü takümtem samaba ajanga Centre sorkari Kuki nunger nem Separate Administration agütsütsü dalang ta agizüktsüla aser azütokshi anendaksütsüla” ta Haokip-i metetdaksü.



Office of the  
**AO RIJU**  
Mokokchung : Nagaland - 798601  
"Kenozülu Yinsem"

### SANGDONGER

Ao Riju (Ao Academy) Sanen Luden Senden, Luroi (August) 3, 2023 anogo amendang teloki bangzünga Lemtetba No.9 dak ajemdaker, Ao oshi nung Kaket zülurtemi meteta alitsü tongtibang onük kar lemsateper. Taoba mapang, Ao Senden Literature Board (ASLB) ta aliba, tang "AO RIJU" ta nungja melenba den ktdangpur tasen shimer maparen ajak inyaka odagi. Anungji shirnokisa Ao oshi nung kaket züludir, Ao Sendeni 2004 küm, Metsüremi 5 anogo, Lemtet 1.(4) nung lemteta akaba ama, Ao Riju temelaba nung dang Ao oshi nung züluba Kaket ajak adoktsü. Ibai Ao oshi zülumen lirumedema amshitsü nükjidong nung lemtetba lir. Anungji kodangsa Kaket zülurtemi kaket azüngtsü atema Ao Riju dangi shitipak (manuscript) yokdir, teküboklen agüja aliba inyakyim dak ajemdaker yoktsüla:

1. Kaket züluba shitipakji Computer agi A4 size paper nung ajena menüngzüker yoktsüla.
2. Oren tsüngda tawa sadema (double space) yutsütsüla.
3. Ojangji font size 12 nung ajenba asütsüla.
4. Shitipak temalen, tekübok, tajichi aser tabelen ajaklen tawa tilatiba agi inch kakabosa toktsütsüla.

Item inyakyim ya aikati meteta alitsü saka ano kar danga ratamata lira, jangjar inyaksü nükjidong nung yangi lemsateper. Anungji Kaket zülur ajaki agüja aliba arla kübok amalitepa shilem agitsü metetdaksür.

Sd/-  
(S. Wati Ozüküm)  
Tongti Zülur

### Nagaland nung maneni tzünglu arutsü akok: NSDMA

**Dimapur, Luroi/August 18 (TYO):** Nagaland nung aruya aliba hopta nung maneni mepet agi süpangba den tzünglu sashia arutsü akok, ta Nagaland State Disaster Management Authority (NSDMA) ajanga sangdong ka nung ashi.

August 20, 2023 nungi aoba anogotem nung maneni tzünglu arutsü imlar. Ajisüaka Kohima, Phek, Wokha, Zunheboto, Mokokchung, Mon, Kiphire, Tuensang aser Shamator district tem nung August 19 nungi August 24 tashi tzünglu kanga

arutsü akok. Kasa mapang state nung minimum aser maximum temperature ya 14°C aser 34°C tsüngta alitsü.

Iba mapang lendong timtem nungi pila alitsü asoshi NSDMA, Home Department ajanga nüburtem dang saksalema alitsü ajungshi. NSDMA ajangasa District Disaster Management Authorities aser sendaktepa aliba department ajunga dang iba meyi mapang takum aser ki o jen kumzüksü asoshi renema alitsü ayongzüka liasü.

### Indian Red Cross Society Nagaland State Branch ajanga training agütsü

**Dimapur, Luroi/August 18 (TYO):** Indian Red Cross Society Nagaland State Branch ajanga nüburtem nem maneni tongtipang first aid training balala agüja arur.

Yamaji August 16 aser 17, 2023 anogotem IRCSN ajanga Mt. Olive College, Kohima aser Kohima-Mariani Transmission Limited, Zhadima, Kohima nung comprehensive first aid training sessions agüja liasü.

August 16, 2023 nü IRCSN ajanga Mt. Olive College, Kohima nung first aid training session takok ngua ayongzüka kaketshir telok balala nem takum kumzüksü skills agüja liasü.

Ajungben tensa tamajung nung tasü ita teyari agütsütsü asoshi kaketshir nem shisatsü agütsütsü nükjidong nung iba training ya agütsü. Iba training nung shilem agirtemi medical tsütsü takotet nisungtemi teyari magütsü tashi yaria alitsü yimyattem sayua liasü.

Maneni August 17, 2023 nüa IRCSN ajanga Kohima-Mariani Transmission Limited, Zhadima nunga training ka ayongzüka liasü.

Iba training ya company nung inyaker dak rangloker parnok inyakba tesem nung medical emergency ktdangtsütsü asoshi agüja liasü.

### PM SVANidhi Campaign kübok sentong balala atema metetdaksür

**Dimapur, Luroi/August 18 (TYO):** Ministry of Housing & Urban affairs nungi shiti aruba ama state tem dang August 1 nungi tenzüka October 31, 2023 tashi ita asem PM SVANidhi Campaign agitsü shia lir, ta Urban Development Department ajanga sangdong ka nung ashi.

Iba campaign ya State level aser ULBs nung Street Vendors

(SVs) nem radio, TV, social media nung teti pist asütsü aser danga ground level outreach mapa tem State/ Cities/ ULBs nung agia Scheme den Street Vendors timba sendakteptsü asoshi lir.

State aser City level nung scheme asendenshitsü asoshi tsünglanglen agüja aliba maparen inyaksü shia lir:  
(Maneni tapak 8 nung...)

### Dimapur nung 'Save Store' dokan tuluka lapokogo



**Dimapur, Aug. 18 (TYO) :** Dimapur nung tagitarutsü aser tachtajemtsü tapu balala aika angudak dokan tuluka tenüng agi 'Save Store' lapokogo. Ibai DC court lenjem anasa Duncan Basti, Tajen Road nung Aor chanu kati lapokba lir.

Tanü iba Save Store dokan lapoktsüba sentong nung, Commissioner of Police, Dimapur Wb. Kevithuto Sophie-i iba dokan kibur Wb.Pirong Jamir aser kinungtsü na nem tenüngsang agüja jembidang, Naga nung lanurtemi pei asoshi dang masü saka tangar nema mapa yamai agütsüteta business tenzüktetba asoshi pelar aser tenüngsang agütsür ta metetdaksü.

" Nia Nagaland nungbo alu tulu ayimer rongnung ka lir, iba

amaji Naga nung lanurtemi government mapa dang mapa amai mebilemi asen lima nung inyaksü nüngdakba mapa ajak mashishii meranga inyaksüla," ta Commissioner of Police-i metetdaksü.

Asenoki government mapa manguba ajanga Nagaland nung 'Unemployment' tebilemstü lir ta jembir saka iba tangatetbaji melenshitsüla, kechiyong asen lima nung mapa inyaker meinyakma lir ta paisa ashi.

Nagaland nung tashiyim agi sarusachiba tebilemstü indang ken o ka lemsatepdang, " tashiyim agi sarusachiba tebilemstü ya Dimapur nungsa tuluba, iba tebilemstü anema asenok longjemer inyaksüla, kopiga asenok yamai timtema

alitsü ? ta CP-isa ayongzüka metetdaksü.

Commissioner of Police, Dimapur-isa nübortem dang arendaka melii ozüng anema tashiyim agi inyakba mapatem metetra yakta dang police dang ashitsüla ta mepishia metetdaksü.

Iba sentong nung Business Association of Nagas tir Wb.Mongküm Jamir-ia tepela aser tajungshi o jembir aser DABA nung sannüker Toshi Longkümeri tenüngsang agüja sarasadem.

Iba 'Save Store' nung ya tsüngsem, tula süoshi, yangku, ki oset, chipo aonpo, auso marok, curtains, electronics oset, jangotsü aser kidang nüngdakba totzü sapon tapu aika jenjang dalang agi angütsü.

### Kohima nung Faecal Sludge Management training temogo



**Kohima, Luroi/August 18 (TYO):** Faecal Sludge Management (FSM) plans tajungtiba nung yanglua mapa kuma inyaksü asoshi state aser district nung Public Health Engineering Department (PHED) ktdangtsür nem nüngdakba shisatsü aser yimyattem angazükdaksütsü asoshi PHED Conference Hall, Kohima nung ayongzüka asemnü sentong tanü temogo.

Iba sentong ya PHED Nagaland, UNICEF aser PriMove Pune lungjemer August 16 nungi August 18, 2023 tashi ayongzüka liasü.

Iba training nung PHED nungi Executive Engineers, Sub-Divisional Officers, Junior Engineers aser State Consultants 30 dak tema dena liasü.

FSM tajungba nung angatetsü, iba nükjidong tali awajemtsü aser mürekmejuba nung tayongzükbatem aser tongti shilem angatetsü

nükjidong nung iba training ya ayongzüka liasü.

FSM kanga benjar aliba tali tongmelang nung benteta inyakyim ajunga angatetsü aser FSM inyakba mapang districts team temi meteta alitsü aser service tajungba nung agütsütsü nükjidong nung iba training ya ayongzüka.

Iba training mapang SBM-G Phase II guidelines, retrofitting of toilets under ODF sustainability initiative, FSM concepts and requirements, aser Urban-Rural convergence amala onüktem awajema liasü.

Maneni iba training nung shilem agirtemi nisung temang nungi jana indokba anepaluba nung technology amshiba, tenem agi sünga aliba tesemtem nung tayongzüka tem angatetepba, Faecal Sludge Treatment Plants (FSTPs) amenoka anepalutsü asoshi shisa lemsatepa, case studies & group works aser shilem agir

temi presentation agüja liasü.

Iba training tatembangba anogo ya FSM planning aser case studies atema liasü.

Ano talisa sanitation workers' safety atema session tongtipang ka agia liasü.

Asemnü agiba training tatembangba nung Er. Repangyangba Longkumer, Chief Engineer & HOD, PHED ajanga sentong tembanga jembir aser Er. Khaoshai Lam, JE Tuensang, Er. Nungshichila Longchar, JE Mokokchung aser PriMove, Pune team nungi ajangshibatem lemsatepa liasü.

Kasa mapang tenüngsang agütsüba aser kulizüng kaket agütsüba liasü aser iba sülen Er. Ichirang Zeliang, Executive Engineer, Sanitation & WSSO, PHED ajanga melepzüng o jembir.

Iba sentong nung JE, Sanitation & WSSO, PHED Imkongjungla Jamir menden liasü.



August 18, 2023 nü Varanasi (Uttar Pradesh) nung G20 kübok Y20 senden nung Ato kilonser, Narendra Modi-i video conferencing ajanga adenba noksa nung angur.

### Tzünglu dak sendakba lendong nung nisung 2,038 süogo: MHA

**New Delhi, Luroi/August 18 (Agencies):** Taküm April 1 nungi tenzüka tang tashi nung India nung tzünglu dak sendakba lendong balala nung nisung 2,038 tashi süogo, ta Hokolbarnü Ministry of Home Affairs (MHA)-i metetdaksü.

Tzümet süng, tsüngi aser anentsüh lendong nung asürtemji teimbaka Bihar nung lir; Bihar nung nisung 518 asü aser Himachal Pradesh nung nisung 330 asü.

Gujarat nunga nisung 165 asü, Madhya Pradesh nung 138, Karnataka nung 107, Maharashtra nunga 107, Chhattisgarh nung 90 aser Uttarakhand nung nisung 75

asü. MHA-isa, April 1 nungi tenzüka August 17, 2023 anogo tashi nung tzümet süng lendong nung nisung 101 samaogo aser nisung 1,584 yiruogo, ta metetdaksü.

Tzümet süng, tsüngi aser anentsüh lendong agi district 335 kongshi- Madhya Pradesh nung district 40, Assam nung 30 aser Uttar Pradesh nung district 27 kongshi.

Himachal Pradesh nunga tzümet süng aser anentsüh lendong agi district 12 kongshi aser Uttarakhand nunga district tenet kongshi.

Tzümet süng lendong nung nisung 892 arakseta asü, tsüngi lendong nung nisung

506 asü aser anentsüh lendong nung nisung 186 asü, ta MHA-i metetdaksü.

Tzüngluruwa mongpu nungsa tzünglu dak sendakba lendong balala nung nisung 454 asü.

State balala nung kümzüka maparen inyaksü aser teyari agütsüsü atema National Disaster Response Force team 160 lemezükja liasü.

Himachal Pradesh nung NDRF team 17 lemezüksü, Maharashtra nung team 14, Uttar Pradesh nung 12, Jammu & Kashmir nunga 12, Assam nung ter, West Bengal nunga ter aser Uttarakhand nung team 9 lemezükja liasü, ta MHA-isa metetdaksü.

### Karnataka nung commission 40% agiba bushisüngdangtsü tuyu

**Bengaluru, Luchii/August 18 (Agencies):** Taoba mapang Karnataka nung BJP sorkari project balala atema commission shilem 40 agi, ta tai tonglokja aliba judicial ajanga bushisüngdangtsü atema sorkari tuyuogo.

Karnataka nung Congress sorkar aruba sülen ita asembuba nung Congress-i taoba sorkari commission shilem 40 agiba retired HC judge Justice Nagamohan Das leniba nung commisiion kati bushisüngdangtsü atema tuyur.

Commission-i public mapa atema project aika inyakba department balala bushisüngdangtsü.

Tamalen Karnataka State

Contractors' Association-i shidi ka ajanga Ato kilonser, Narendra Modi aser taoiba Chief Minister na dang sorkar ketdangsertemi public project balala atema commission shilem 40 agir, ta metetdakja liasü.

Project balala metenzükdangyong commission shilem 25 nungi 30 tashi ketdangsertemi meshi aser mapa tembangba sülen tanüngba shilemji meshi, ta sangdong nung shia lir.

"Sorkar nem tai tongloksüyonga iba atemaji kecha meinyak. Sorkar tasenbai yimsüsüba tsütsü maparen ajak teladak süner," ta sangdong nung shia lir.

B u s h i s ü n g d a n g b a

commission jagi project balala ajakji telatetbatem nung ajemdaker ketdangsertemi agizük asü mali, mapa inyakba 'quality' koma ibaji bushisüngdangba den külemi rates aser sen teindokba ajak bushisüngdangtsü.

Bushisüngdangba mapang nungji department balalai parnok indang file ajak commission nem agütsüsüa akümtsü.

Taoba assembly election atema nüboyimba mapang nung Congress-i parnoki election nung takok ngura sorkar ketdangsertemi commission shilem 40 agiba bushisüngdangtsü, ta nüburtem dang nangzüka liasü.



August 18, 2023 nü Gandhinagar nung G20 linüktem nungi Health Minister tem senden amendang tangokba noksa nung angur.

### Taruba Lok Sabha election nung Rahul Gandhi-i Amethi nungi tokteptsü

**New Delhi/Lucknow, August 18 (Agencies):** Sangküm Lok Sabha election nung taoba mapang Congress Tir, Rahul Gandhi-i Amethi menden nungi tokteptsü, ta Uttar Pradesh nung Congress Tir tasenba, Ajay Rai-i metetdaksü.

Rai-isa, party lenir Priyanka Gandhi Vadra-i Lok Sabha election nung tokteptsü telemtetba agira lai Varanasi menden nungi tokteptsü aser ajaki la nungittsü, ta metetdaksü.

Ajay Rai-i 2014 aser 2019 küm Lok Sabha elections naprongla nung Varanasi menden nungi Ato kilonser, Narendra Modi den toktepa liasü aser tamakok angu. Brihostibarnü Congress Tir,

Mallikarjun Kharge-i pa Uttar Pradesh Congress Tir shimogo.

2004 küm nungi Rahul Gandhi-i Amethi Lok Sabha menden nung takok ngua aru, ajisiüaka 2019 election nungbo pai tamakok angu. Amethi menden nung BJP nungi Union minister Smriti Irani-i Rahul Gandhi madak takok angu. Ajisiüaka iba election nung Rahul Gandhi-i Kerala kübok Wayanad menden nungia toktepa takok ngua liasü.

2014 Lok Sabha elections nung Rahul-i Smriti Irani madak takok ngua liasü.

Smriti Irani ajja Rai-i, nai Amethi nunger nem shini seret nung sen 13 agi agütsüsü nangzüka tu koma asü?, ta asüngdang.

### Tir Murmu-i anogo asemnü Goa semdangtsü

**New Delhi, August 18 (Agencies):** Linük Tir, Droupadi Murmu-i August 22 nungi tenzüka anogo asemnü Goa semdangtsü, aser iba mapang nungji lai state legislative assembly nung jembiba den külemi sentong aika nung adentsü, ta ketdangser kati metetdaksü.

Mongolbarnü Tir Goa tonga arutsü aser nikongdang lai Panaji nung aliba Martyr's Memorial semdanga asürtem nem akhüm agütsüsü; iba sülen la Raj Bhavan nung agizüksü, ta state information & publicity

department-i metetdaksü. August 23 nü la Goa University convocation sentong nung adentsü aser nikongdang lai state legislative assembly nung jembitsü.

August 24 nü lai Aso 17buba mapang Portugal nungeri yangluba Fort Aguada semdangtsü, iba sülen lai Aso 16buba mapang yangluba Tenla ki Basilica of Bom Jesus semdangtsü.

Tatamsa lai Ponda nung Shantadurga tekülem ki semdangba sülen Delhi-i meyipa aotsü.



August 18, 2023 nü Bhopal nung osangbenertem senden ka nung Madhya Pradesh Congress Tir, Kamal Nath (ajichilen nungi tanabuba) den party lenirtemi Shivraj Singh Chouhan-i aniba sorkar ochimashi indang poster ka sayadang tangokba noksa nung angur.

### Chhattisgarh sorkari Himachal Pradesh nem sen cr. 11 teyari agütsür

**Raipur, August 18 (Agencies):** Hokolbarnü Chhattisgarh Chief Minister, Bhupesh Baghel-i state sorkari tzümet süng aser anentsüh lendong agi kongshiba state-Himachal Pradesh nem sen crore 11 teyari agütsüsü, ta sangdong.

Brihostibarnüa Baghel-i phone ajanga Himachal Pradesh Chief Minister, Sukhvinder Singh Sukhu den tensa osang metetpela aser akokba tashi yaritsü ta lemsatapa liasü.

Hokolbarnü Baghel-i sangdong ka ajanga, alima tzümpung lendong agi 'Devbhoomi' (tsüngremtem lima) Himachal Pradesh

mejungu kongshiogo, aser iba ama tensa ka nung Chhattisgarh nung aliba nüburtemi tebilemstsü katsür, ta metetdaksü.

Chhattisgarh nüburtem ajak tenüng nung sorkari Himachal Pradesh sorkar nem takoksa angurtem yaritsü atema sen crore 11 teyari agütsür, ta metetdaksü.

Brihostibarnü Himachal Pradesh nung ketdangsertemi ashiba agi, Amongnü aonung nungi tenzüka state nung tzünglu dak sendakba lendong balala nung nisung 72 süogo. Amongnü nungi tenzüka tzünglu maneni aruba ajanga state yimtiba, Shimla densema tesem balala nung anentsüh lendong kanga bulua atalokdar.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 19, 2023

### Asenok tenla ki aser tekülem

**A**lima nung tamangba yimsü shia atema tekülemdak tesem ya pei Tsüngrem ajurudak kanga tongtibang tesem ka lir. Iba tesem nung oagi asenoki rongsen dang masü saka asen temulungjang tenla agütsür. Tenla ki ya Tsüngrem nem tenüngsang agütsüdak aser tadok nangzükdak aser tanela nung tashi itshidak tesem lir. Iba jagi tamangertem ajak longjemer jangratema külemi kulisütepa külemtsü asoshi akok tashi asenoki tenla ki kanga topur junga yanglur. Ajisüaka, asenoki aiben tenla ki ya tanga lokti adenshidak ki ama bilema Tsüngrem pelatsüsa shilem agitsüabajibo yutsür asenok nisung nüka agia metizükttetsüsa shilem agiba aiben tenjir. Tanü putu nung balaka lanurtemi asaperanga tsüngsangba sentongtem aginür, anungji aiben tenla ki ya Tsüngrem külemba ki amato masü saka alima shi azü ajak salaa kentenmenüba tesem amato kümadoker. Atangji, alima nung takaba kongki ajak amshia ken tena jokdena aser teka maa tsüngsanga Tsüngrem tenüng sanga külemtsüabajibo Laishiba tesayuba lir, anungji yamaji temulung ajak salaa tematiba Tsüngremji külemtsüla. Ajisüaka, tenla kidang alima ken tena shi azü jangraba yimya sayua tsüngsanga pelatepra, iba jagibo temeshi tenla kiji menenmenaksür aser Tsüngrem külemtsü melen atalatsür asütsü. Aiben asenoki tenla kidangi aoba ya Tsüngrem külemi aoer masü saka pei topur ajung aser süoshi sayutepba sentong nung shilem agii aoer amai aoer. Atangji, Tsüngrem külemdagi aodang temang jungjunga merükmejur süoshi tajungtiba agir aoba jagi tekülem telongjem meraketdaksür, anungji junger. Ajisüaka, tenla kidangi Tsüngrem külemi aoer ser nung temang telong, teku aser tepizüng ajak sayua agira, ajibo tenla kidangi aoer masü saka alima shi azü saladak sentong kati aoer dang mesük. Alima nung alir asünungji asenok achiajem, kentenmenü aser sübosülemtsü agiba shia nung sobaliba kaka lir. Aji oda, social work ka nung shilem agitsü aoer ser nung neck tie agir ora ajia masü. Kasaji kiyir bebjong ka nung adentsü aoer ser nung mapa inyakdang asemba süoshi mashi ka semer aobajia tim masü. Iba amaji asenok adentsüba sentong aser tesem jagi asenok süoshi agitsüba yimya indang dena ashir. Asenoki tapu aika jembiyonga amungnü tekülem sentep sentong yabo akhi yimya nung osangtajung ken kakat nung aliba kentem külemi dena Laishiba nungia tapu aser tekong karbo külemi azüngtsü, Kibubai sayuba sarasadem agitsü aser tesayuri Tsüngrem o jungjunga renemer bener arua lemsateptsü ta külembasa akhüm taketba aser tajungba. Iba jagi asenok Tsüngrem anasai tali odaktsür aser iba jagi dang tamang aiener. Atangji, lanurtem sentep sentongji balaka, item sentongtem nungjibo alima tsütsü mayakoya kentem matentsü aser jilushi maitsüba dang ashi, alima nung takaba kongki ajak bendena tenla ki jara dena shipoka aotsüsa ola adoka tsüngsanga ken atentsü aser sarasadema Tsüngrem külemtsüabajibo tim dang lir. Ajisüaka, Khristan taküm ka tatidang ajak kokteta aotsüba tashijibo kongki tema tsüngsanga ken atenba nung jagi masü saka Tsüngrem o bushiba ,angaba aser benshiba nungi angutsü. Tanü asüng asenok arogo aika nung kentenmenü nung temulung tagütsüba aser Tsüngrem o bushiba aser sayuba nung temulung magütsüba ta akümba angur. Iba jagi Tsüngrem o jembisangi aiben Laishibaa shitak melapokteter aser tamendakdak lai tekong dena zünpeta zünger Tsüngrem o jembu tenzüker. Atangji, iba jagi arogo züngsemtem tezüdangdaksür. Ibaji memetet ser asenok arogo lenirtemi arogo züngsem purtem dang sentepi arutsü ajungshir, ajisüaka Tsüngrem o junga bushir anganüa magütsütetra, kechiba mapang endoka sentepi aotsü ta züngsemtemibo bilemer. Kasaji asenoki arogo züngsem purtem dang tenla sen shitak agütsütsü ajungshir, ajisüaka arogo lenirtemi Tsüngrem o a junga mejembir aser arogo züngsemtem ki aser parnok kibong tia indang mangu nung, kechi atema tenla agütsütsü ? ta züngsem aikati bilemer. Item ajakji kodang jungjunga bilemdangdir, asenok tashimaitji tenla kidang Tsüngrem jungjunga külemtsüasü asenoki meinyakba aser melitetba ajanga adoker ta asenoki angatettsü. Atangji, asenok tsürabur arogo toktsür balaka nung külemba agi mesüra Prayer house nung aliba agi asenok tamang jenjang atutsü ta masü, ashiko iba jagibo asenok tamang nung lanuba-ang kümshitsüa akok. Ajisüaka, kongka sang, kodang asenoki tenela nung Tsüngremi agizükttetsüsa külemdir, ibajiang tekülem langa asütsü.

## OLEMSABANG

### Doctor-tem nem nübur-i inyakdaksünüba aser nübur taginüba

L. Kika Pongener

Alima nung mapa (Profession) tajung rongnung tajungtibaji 'Doctor' mapa ya asütsü. Tulur-tilar ajungai Doctor-tem dang kanga akümtsübur. Yimdak-yimtsüng nung alirtemi balaka Doctor-temji Tsüngrem amai bilema kanga aküm aguja tushir, kechiyong Doctor-temi nisung ka tashidak tamajung keter, jenjang kanga mejungi aliba tia ka nungi taneptsü agütsür, aser nisung ka tasütsüba jenjang ka nungi tanaben meyipa taküm dangi shilangdaksür. Anungji Doctor-tem dang Tsüngrem amai akümtsüburaji tim dang lir. Aji oda, Doctor-tem asoshia nuburtemi kanga akümtsübu agütsüabajibo maongka dang masü, saka khuret tulu-a ta angateta pei mapa nung nendak-nendaka inyaksüla. Doctor-tem dang masü, saka Nurses-temi anir Hospital nung inyaker Staff-tem ajunga dang kanga akümtsübuttsüla. Ano tip kulen shisadanga, Doctor, Nurse, Technician, Pharmacist, Attendant etc. item ajungaji 'Missionary' ka den kecha tepila mali ta ashitsü akok. Anungji iba mapa ya tepok mesua alitsüba mapa dang masü, saka 'Missionary' mapa, tanela anir aruba mapa nung shilem tulu-ka ta angateta, shiranger ajak dang kecha tebandang meli-i kanga meima anepalua yaritsüla. Sorkar Hospital nunga süang, nuja Hospital nunga suang, Doctor, Nurse, Pharmacist, Technician, Attendant & Staff ajaki Tsüngrem tsüngdang sentsüh masütsüsa, shirangerongnung, tulur-tilar, takar-sensaker kecha mebendangi kusasa meima anepalua yaritsü nuburtemi akhanger.

2nd August Tir Yimyim osang kakat nung, sorkari 'In-Service Doctor'-tem dang pei nuja mapa meinyaktsü tuyur... ta zülur adokba nguogo. Ano kusa anogo nungjisa, Nagaland Post nunga, 'Health and Family Welfare Department serves ultimatum on Doctors engaged in private practice'.... ta zülur adokba nguogo. Iba ocet nungjisa sorkar-i kanga dang tongtipang o ka shia angubaji, sorkari küm ka nung in-service Doctor-tem nem 'Non-Practicing Allowance' (NPA) agutsüba nung sen crore 9.00 shi endoker...ta zülua nguogo. Aji oda, Doctor-tem nem sorkar-i itasen tulu agütsüba dang masü, ano 'Non-Practicing Allowance'-a agütsür sernung, ashiko, Doctor-tem karibo ibajagia tenük mesungi pei nuja Hospital/Clinic lapoker 'Practice' sua alitsü akok. Anungji akokba tashi sorkar Hospital nung tenzüker Doctor-tem ajaki sorkari itasen agütsüba den 'Non-Practicing Allowance' agutsüba jagi temulong sur, pei nem nungloktsüba mapa nung tamakok maludaktsüi nendak-nendaka inyaksü nüburtemi Doctor-tem dak nungi imlar. Aji oda, Doctor-tem ajaki mesuaka, kari sorkar mapa nunga tenzüker aser pei nuja Hospital/Clinic-a lapoker inyaka aliyongji, sorkari iba tetuyuba ya agutsür südi, kechiba süra kodang nisung kati mapang ka nung mapa ana repa inyakdir, pai/lai ka nung temulong agutsüdang tanga ka nungji tamakok aludaktsütsü. Aji oda, pei nuja Hospital/Clinic nung temulong agutsüdang, sorkar Hospital nung pei nem nungloktsüba mapa nung, mapang shidak nung marutettsü, tim teinyaktsü shidak mapang nung meinyaktettsü. Aji oda, Doctor aser Nurse-i mapang shidak nung tim teinyaktsü inyaka meyarira, ashiko, shiranger karbo kümzükttetsüba sernung mekümzüktteti taküm tembangtsüa kecha meteta maka. Anungji sorkari itasen dalang agutsüba den 'Non-practicing Allowance' agutsüdarji, Doctor-temi akok tashi Pension mangu tashibo pei nuja Hospital/Clinic melapoki, sorkar Hospital nung pei nem nungloktsüba mapa nendak-nendaka tenzütsü nüburtemi akhanger. Anungji sorkar Hospital nung tenzüker Doctor-tem ajaki, akokba tashi mapang shidak nung Hospital tongdaksüner aser sorkari atakteta yutsüba mapang shidak inyaker sodi sudaktsünur. Yisu alima nung alidang pai ashiba, "Shingaia Kibur ana metenzükttet, kechiaser pai ka sempatsü aser ka meimtsü, mesüra pai ka dak temulong agütsütsü aser ka mezüngmeshitsü" (Mathi-6:24). Yisui ashiba ama, nisung kati mapang ka nung külemi mapa ana nung sotaka tenzükra, pai ka nung temulong kanga agutsütsü aser tangabajibo zübazüba-a senzüka yutsütsü. Atangji, Doctor-tem aikati kanga nendaka tenzükra ngua nuburtemi kanga temulong achir, saka ano kari danga pei nuja Hospital/Clinic nung temulong agütsüdang, sorkar mapa nung temulong magutsüi zübazüba-a senzüka tokja lira, tang nungi danga temulong agüja tenzütsü ajungshir.

Ano nüburtemi Doctor-tem nem inyakdaksünüba kanga tongtipang kaji, sensaker mekokmeinertemang timba sorkar Hospital jagi arur asünungji, koktetsüba tashibo sorkar Hospital nungji anepalua yaridaktsüner, oda 'Major operation' asüyongjia takoktsü lenmang dang lira, nuja Hospital-i moodaktsüi sorkar Hospital nungji agia yarinungbo kangasa ajungtsü, kechiyong nuja Hospital nung sen tasak agüja agitsü makokba agidang sorkar Hospital jagi arur. Ano sensaker/tilarterm teimba tetsür nusotsüba khangshia pei kidang mesoteti tim-atemba agi sorkar Hospital-i arur, anungji Doctor & Nurse-tem 'Patient' danga aika yaria kanga mazüngi alitsü akok, ajisuaka, nusotsü kangshirtemjibo mapang menua senzüka metoktsüi, parnokji tamasa anepalua yarinungbo kanga ajungtsü. Aji oda, kanga mejungi shirangerongnung balaka Hospital tonger, mapang talangka menua anepalu mesui toktsüra, ashiko mapang shidak nung anepalua repringnungbo kümzükttetsüba sünnung, tia maka karbo mekümzüktteti arishi tembangtsüa akok. Anungji akokba tashi 'Serious Patient'-tembo Hospital tongli-i, memenui anepalua yari nungbo kanga ajungtsü. Anungji akokba tashi sorkari itasen aser allowance teperi agutsür tenzükdaksür asünungji, sorkari tuyuba amaji Pension mangu tashibo pei nuja Hospital/Clinic melapoki pei nem nungloktsüba mapa nung, nüburtemi aginuba ama nendak-nendaka inyaksü ajungshir. Atangji, temalen shisemba ama, Doctor mapa yabo kibong, taküm aser tepok mesua alitsüba mapa dang masü 'Missionary' mapa ka mesuka lir. Anungji nuburtemi koda-ka akümtsübur patak-kaji khuret lir ta angateta, Tsüngrem tsüngdang sentsüh masütsüsa nendak-nendaka tenzütsü sorkar-i tuyuba denji semloka ajungshir. Aji oda, Doctor-tem ajaki kanga junga tenzükdagi, saka ano tali tajungba tenzütsü nüburtemi Doctor-tem nungi yimlar.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

### India nung Khristantemi kum ka piyong sarasadem tenzükogo

**August 18, 2023:** India tesem balala nung aliba Khristantem online ajanga longjemba sülen "United to Pray for India" (UTPFI) tenzükogo; iba sentong kübok linük nung Khristantemi August 15, 2023 nü sarasadem tenzükogo aser sangküm Independence Day - August 15, 2024 nung ang sarasadem sentong ya tembangsü.

UTPFI ya organisations aser Arogotemi longjemer tenzükba sentong ka lir.

Osangbener den jembidang Evangelical Fellowship of India (EFI) General Secretary, Rev. Vijayesh Lal-i "Iba ya maneni sarasademtsü sentong ka lir. Tsüngremi linük tesem balala nung lenirtem melungjang nung linük atema maneni sarasademtsü ajungmesoa liasü. Tsüngremer mapang ka nung onoki longjemer jembia aser

Arogo den organizations balala nungi core group ka tentet, iba sülen iba sentong ya tenzük," ta metetdaksü.

United to Pray for India kübok linük tesem balala nung Arogotem aser nijatem den hopta shia aser ita shia sarasadem onük balala lemsateptsü.

Iba sentong ajungkettsütsü atema Evangelical Fellowship of India, Mumbai Transformation Network aser Body of Christ-i longjemer inyaksü.

Zoom nung iba sentong tenzükba mapang nung nisung 600 dak tema aden aser maneni iba osang angashia ano nisung teimtibia shilem agitsü imlar.

August 15, 2023 nü iba sentong tenzükba linük naklu ken aten aser Rev. C B Samuel-i Tenüngsang Ken 144 nungi onük jembiba sülen Pastor

Shelton Davidson-i linük naklo nung ajemdaker Tsüngrem dak teimla akaba sangdonga liasü.

Sarasadem tetenzük sentong nung ochimashi, sensak tia, nisung shibelenba, Arogo reshikangshiba aser tetsürtem tebilemtsü onük balala atema sarasadem.

Khristantemisa linük nung region trok: North, South, West, East, North East aser Central India atema sarasademba den külemi taküm agitsü aliba state assembly elections aser sangküm agitsü aliba Lok Sabha election atema-a sarasadem.

Sarasadem onük shia nung loktii sarasadem aser lenir kati sarasademji tembanga liasü. Sentong tenzükba ADF nungi Tehmina Arora-i sarasadem aser sentong tembanga Jayalaxmi-i sarasadema liasü. Iba sentong ajakji Hindi oshi agi meyipja liasü.

### Lebanon nung Khristantemi Iraq nunger atema sarasademtsü

**August 18, 2023:** Lebanon nung Khristan lenirtem adenshia Iraq nunger Khristantem aser Chaldean Catholic Arogo atema sarasademtsüogo.

August 12, 2023 nü Lebanon yimtiba, Beirut nung aliba Archangel Raphael Tenla kidang sarasadem sentong nungji jembidang Beirut nung tongti putir, Michel Kassari-i, "Iraq nung asen Arogoi timtem tensa ajangshidar," ta ashi.

Iba sentong nungji Catholic aser Orthodox Arogotem nungi lenirtemi shilem agi.

Paisa, "Asenoki nokdaksü. Asen tekümsükerji Kibuba lir. Oh Kibuba, Nü tesangwa yadakjang aser onok moajang; ozü santem, putirtem aser Nü osangtajung prokertem ajak moajang, Iraq aser nüburttem moajang, Chaldean Arogo moajang, Lebanon moajang aser ozü linüktem moajang," ta sarasadema liasü.

"Tsüngremi iba temeshi lima nung asenok toktsüogo, ainkar Abraham aliba lima, Chaldea nunger Ur lima," ta Kassari-i ashi.

Chaldean Arogo tera ayangdak linükji Iraq lir.

July 15, 2023 nü Iraq nung Chaldean Catholics tongti lenir, Louis Sako-i, "Pei atema dang bilemba, telemsa adokba aser anemsü ajanga yimten, linük aser libaliru kanga mejungi akümba mapang ka nung asenok Iraq nung alir. Teyarir maliba Iraq nunger Khristantem Tsüngremi yariang ta sarasademer," ta metetdakja liasü.

2003 kum tashi nungbo Iraq nung Khristan nütsung million 1.5 dak tema liasü, ajisüaka 2014 kum nungi Islamic State kiralongrartemi timtem agütsüba ajanga Khristantem aika jenshi, aser tangbo linük nung Khristan nütsung 200,000 den tajemba lir.

Sarasadem sentong nung jembidang Kassari-i, "Asen tamang ya lung tulu amai lir, kechi komaka timtem ajurudir ajuruaka asen linüktem nung iba metsühjang ya maneni alitsü," ta ashi.

Kassari-isa, tamalen tenzükertemi inyakba ama Sako-ia Iraq aser alima nung Chaldean Arogo ajungkettsüba nung shilem agiogo, ta ashi.

Sarasadem sentong lenir, Lebanese Cardinal Bechara Rai-i, Tejen Lai aser Tasen Lai nung Tsüngremi Pa sasa jungkai adokba linüktem aser Khristan yimsü tera ayangba linüktem- Syria, Israel aser Lebanon nung timtem jenti lir," ta ashi.

"Tsüngremi asenok item linük nung lidaktsüner; yamaji asen tamang, teimla aser temeim manokshii lir. Yamaji maneni adianu temiemtep nung amalitepa alitsü aser senso ajak akhümtsübuttsü," ta paisa shisem.

### ANOGO ABEN TSÜNGREM DEN

#### Ne mulungtet takang

Aser kodang pa temai adoka agizüksü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.

Khristan taküm nungi atsüngzüka aotsü temela! Kodang Tsüngremi ne nem kechi inyakdaksüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtetsü. Pa temulungtet tejanga ngur Samaria nungeri Yihuda nunger ka parnok yim ajanga Yirusalemi aor bilema parnoki pa magizük.

Yisui pa tenyaba nungi matsüngzüksü mulungtet saka pai lelang nung aika tenzüksü mapang agi pai nütsung neter temeket townsi yok (Luke 10:1). Pai chitemra akettertem anebtsü (Luke 17:11-19). Temang waka shirangertem anebtsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsungtem dang sayu (Luke 15:1-32). Yisu Kalvaryi atudang Pai tangar tenzüksü mesongtem saka Tebui mulungba nungi atsüngzüksü pai memelung.

Tsüngremi ne nem kechi inyakdaksüner nai metetta lira, ibaji atalokdaksütsü bendanga mulungtetter, ne tejak mulung mulunga iba tsütsü meyipang (A.Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdaksütsü kümdangang. Tatitangbai tashi angatsü menua tekümdaksü mesüra tesentokdaksü. Nai Tsüngrem nungi tejangja mapa agizük, ne tashi angaba nung mainshi inyaksüla.

### Ojala Yashikala nungtem Longsa Peniel Prayer Home nung guest house ka sütsü



Longsa Baptist Arogo, Pastor, Rev. Spongchiten-i Peniel Prayer Home Longsa nung ojala Yashikala nungtem sütsüba guest house ka meshiteta lapoktsür külen lar kinungertem den külemi tangokba noksa nung angur. Mokokchung, 18th August, 2023.

**Mokokchung, Aug. 18, 2023** Teyonglepla na jala Yashikala (TYO): Asür N.I Jamir kinungtsü Asür Wt. Yashikala nungtem Longsa yimda Peniel Prayer Home nung aienertem anendak Guest House yangluba ka Longsa Baptist Arogo, Pastor, Rev. Spongchiten-i meshiteta sarasademer lapoktsüogo.


Iba ki ya tsürabur N.I Jamir aser ojala Yashikala na jala aser tamo (amoaja) nungertemi tenla-a sütsüba lir. Iba guest house den külemi ano N.I Jamir'er kibongisa Peniel Prayer Home nung ki ana sütsüba Rev. Spongchitenisa meshiteta lapoktsü.

N.I Jamir aser Yashikala na nem chirnur 9 - tetsür 6 aser tebur 3 moatsü. La arishi kum 23 asüdang Imnukloba (N.I Jamir) den 1943 nung kibong aküm. Kinungbu N.I Jamir Chief Secretary menden tashi tonga inyaker ano minister menden nung lia Sept 7, 1996 nung iba akümli toktsür ao. Tebu Aonungshu aser tetsü

Teyonglepla na jala Yashikala 1920 April 9 nü aso aser 19th Oct, 2017 nü arishi 97 nung asü.

Ojala Yashikala ya sempetjep tetsü ka liasü. La dak temeim, taremsük, ajemalu, shisataka, Tsüngrem aküm tsübuba, meranga inyakba, teka mapa nung techira, aser ajak den jungtepa lokti ajungkettsü aser yimjung asoshi inyakba tetsü ka liasü, ta la otsü ajanga angazüker. La sempet tajung ajiteta Watsü Mungdang-i 2001 kum "Aolima nung tetsü tajungtila" (The Best Mother Award) konang senpettsü.

Tanü ki lapokba sentong nung N.I Jamir'er kibong nungi Imtirenla, Chubala, Alemtemshi Jamir (IAS Retd) aser Minister Metsübo Jamir, Longsa Village Council Chairman - Talichuba, Longsa Arogo tenung nung Spongmeren deacon parnoki shilem balala agia tepela o den tayongzüka o tulu bener arua lemsatep. Iba sentong tembanga Chubayimkum Pastor, Temjen-i tenüngsang agüja sarasadem.



Archaeologist temi Israel nung yimti süngküm tejentiba ngutetogo; iba süngküm ya kum 5,500 tejaklen yangluba lir, ta August 15, 2023 nü ketdangsertemi metetdaksü. Yimti süngkümji Tel Erani site nung lir, ta Israel Antiquities Authority (IAA)-i metetdaksü.



### Xi Jinping-i South Africa semdangtsü, BRICS senden nung adentsü

**Beijing, Luroi/August 18 (Agencies):** China Tir Xi Jinping-i South Africa nung BRICS lenirtem senden nung adentsü, kechiaser pa taruba hopta iba linük semdangi aotsü. "Republic of South Africa Tir Cyril Ramaphosa-i jaokba ama Tir Xi Jinping-i 15 buba BRICS Summit nung adentsü, koba Johannesburg, South Africa nung agitsü lir aser August 21 nungi 24 tsüngta pai South Africa semdangtsü," ta foreign ministry odongtar Hua Chunying-i online sangdong ka nung ashi.

Ibai Xi asoshi 2023 küm bendang lima semdangba tanaben alitsü, shibai March ita Russia semdanga liasü. Africa nung yimtenren aser rongsenketzüng tsütsü tesendaktep tajungba akumtsü meranga China tiri South Africa ya 2018 küm semdanga liasü.

Brazil, Russia, India, China aser South Africa linüktemi tentetba BRICS senden ya taruba hopta Johannesburg nung adenshia aliba rongsenketzüng shilem pezü sadanger shilem ka ajungba linüktem ya 'geopolitical force' kumer takatait linüktem den tokteptsü indang jembitsü.

(Maneni tapak 8 nung...)

### Akümlü toktsür orr küm 50 ajungba bilemteter



ASO: March 15, 1895

ASÜ: August 19, 1973


#### Watsü Lt. Tsükjemsangla Jamitsür (Changtongya Yimsen)

Oja/Otsü iba lima nungi nai onok toktsür orr küm 50 süitema aruogo saka nü mapa tajung onok mulung nungi kodanga amatsü makoker.

Tanü nai inyaka toktsüba tsüngsü nung sarrasadema amonger.

- Nü temeim jala, semchirsemmurtem aser anükapangtem.

### MULUNGNEN O



Onoki teti meima aliba Ojala asür **Mrs.Repasongla** (Mongsenyimti), la temang nung tashimait anogo ishika timtema lir, August 11, 2023 anogo nung Kibubai la teti anisüngzükdagi anir ogo. La shiranga aliba mapang aser la iba akümüli nungi pilar onok mangyim jashi nung alidang ana aser talang nungi shirnokisa nübo, rongsen, shisatsü aser sarasadem agi onok dang meima yaritepogo, nenok ajak den onoki kanga pelaba mulungnen o lemsateper.

Tsüngremi nenok temeim mapa asoshi ano tali moajangma. **Lai toktsür aoba temeim - Kinungbo, jala, jabaso, semchir aser kinungertem.**

### Ukraine combat drone ajanga central Moscow nung ki raksatsü: Russia

**Moscow, Luroi/August 18 (Agencies):** Russia indang air defence systems ajanga khazüka yokba Ukrainian military drone ka Moscow yimti nung aliba ki ka nung tsükok, koba unmanned aerial vehicles temi Russia yimtiba amakba tesüsaba alitsü.

Moscow Mayor Sergei Sobyenin-i Telegram messaging app nung sangdong ka ajanga ashiba agi, air defence system ajanga drone ka Hokulbarnep khazüka yok aser iba indang teraksa ya Expo Center complex nung tsük.

Iba Expo Center ya sentong tulu ayongzükbä mapang, talisa exhibitions aser conference mapang amshir, koba Kremlin nungi kilometre pongu majung pilar lir.

Russian media ajanga video prokshiba nung yimti nung aliba skyscrapers anasa mokozü temeim adoka aliba nguogo.

Ukraine-i drone amshia amakba ya anepdang 4:00 ako meta tenzüker aser iba mapang parnoki Moscow aser Moscow region nung aliba 'objects' nung unmanned aerial

vehicle amshia amak, ta Russian defence ministry ajanga ashi.

"UAV ya air defence weapons ajanga jangjatetba sülen lenmang melenshi aser Moscow nung K r a s n o p r e s n e n s k a y a embankment area nung nisung maliba ki ka nung tsük," ta ministry ajanga Telegram nung ashi.

Moscow indang mayor-i, iba lendong atalokba tesem nung emergency services lir saka asü-amaba osang mali ta ashi.

"UAV teraksa ya Expo Center tesem nung tsük aser iba ki kanga sashiabo meraksa," ta Sobyenin-i Telegram nung ashi.

Expo Center indang pavilion jara tera lao, ta sorkar meyong TASS news agency ajanga ashi.

Jara ya square metres 30 (323 sq ft) shi lao, ta ashi.

Moskva ayong anasa K r a s n o p r e s n e n s k a y a embankment nung aliba Expo Centre nungya mapang shia exhibitions aser trade shows nung amala ayongzüker, ta par website nung shia lir. Iba tesem ya Moscow-City nungi

metre 100 pilar lir, koba linük yimtiba indang business district nung office balala lir aser yangji tan ita khazüka yokba drone teraksa agi anaben kongshia liasü.

Moscow nung aliba Vnukovo international airport anasa airspace mapang tatsüka shibanga liasü aser tayimtsü aruba aser aoba menu, ta TASS ajangasa ashi.

Moscow aser iba meketa aliba tesemtem nung tawa mapang shia drone amshia amaker, aser Moscow indang financial district nunga drone amshia anaben amaktsü merangba nokdangtet saka ki atongtepa süa alidak terara raksatsü. May ita Kremlin anasa drones kar khazüka yok.

Taoba ita Ukraine Tir Volodymyr Zelenskyy-i rara Russia lenir arur aser linük indang 'symbolic centres aser mitkar aliba tesemtem nung Kyiv-i tenük yoker, ta shia liasü.

Brehostibar aonung Black Sea nung ozü warship tem amaktsü Ukrainian marine drone ka aruba meindok, ta Russia indang defence ministry ajanga ashi.

(Maneni tapak 8 nung...)

### MOLUNGNEN O

"Kodang ni ontakdir ni tesunep nung amua odi, kechiaser oh Kibuba nai dang ni kumzüka lidaktsür" Tenügsang Ken 4:8



PANGJUNGSOSANG  
19.11.1968 - 07.08.2023

Nü o agi onok molung süngzüksü  
Nü teyari agi onok tashi itshi &  
Nü temeim agi onok takum ali.  
Onok tejashi tulu nung alidang nenoki temeim sayba asoshi pelaba lemsateper.  
Onok pelaba o agi merasatet & aser onoki kodanga mamadoktsü.  
"Asenok asoshi tatem maka. Na kong ledir liaka, onok molung nung teti alitsü."

-Temeim Kinüngtsü aser Chirnurtem.

Office of the  
**LONGJAKREP SEMCHIR TELUNGJEM**  
Headquarters: Mokokchung, Nagaland

### SANGDONGER

Longjakrep Semchir Telungjem tanabuba mungdang 19th-20th January, 2017 Longsa alidang Pangzüng No.3 nung- "Mokokchung Town nung Longjakrep Semchir Telungjem atema office cum Conference Hall - ki yanglutsü renema ayu aser iba ki amendaktsü atema tesem (site) bushitsü asoshi mungdang ketdangpur nem nongloktsü."

Nongloktsüba ama ketdangpurtemi mapang agia tongtepratep aser jaka/site ka ngutetogo. Oboula Semchir kanga tia aka, Mokokchung Longjakrep Semchir Kichu kidong-i iba ki asütsü asoshi tesem/site tajung ka mulungsua angati agütsüogo, kanga pelar. Iba kimong ya Ao Naga Customary Law Court aser All Ward Union building DC Hill Mokokchung anasa lir. Mungdangi nongloktsüba ama ketdangpuri kimong bushitetogo saka iba kimong signboard-ang ka angenloker tejen kuma songbanga yua lir.

Fund Raising/Building Construction Committee ka shima iba maparen building architecture/ estimate ajak renema yangluogo. Anungji, iba ki asütsü asoshi yim shia Longjakrep Semchir naroka (naroküm), kidong aser temulunger ajaki shilem agütsüsa aküm nung yimtsüng ajak dangi tenlateptsü asoshi mepishia shiti yokogo. Kechiyong, tzükong aser yim balala nungi kidongi aser temulungertemi kwika tenladir pelashishia agizüka iba ki yangluba nung amshitsü. Iba tenla agütsüba jagi Longjakrep Semchir ajaki shilem tajung agiba kibur temeten aser longjemba tali shisangdaktsür. Iba tenla/saru July, 2023 tatem tashi nung ketdangpur dangi yoktsü/tongtsütsü mepishia sangdongba ama yim aika nungi mulungsoa tenlaba ketdangsurtemi agizükdar. Yamaji, yim kari ano merenemtetba agi ano meyok alinunga aser kari agütsütsü renema alinunga meratai yoktsü (tenlatsü) asoshi iba osang kaket ajanga maneni sangdonger.

**Tongteprateptsü No-**  
Wb. Lima Kichu - Convenor, Fund Raising/Building Construction Committee - 7085614768  
Wb. Imolemba Jamir - 7005521448  
**Sd/-** Wb. Imolemba Jamir **President**  
**Sd/-** Prof. Sangyu Yaden **Gen.Secretary**

Office of the  
**LONGMISA SENSO MUNGDANG**

P.O.Mokokchung-798601. B.P.O. Longmisa  
Mokokchung :Nagaland.

### TENÜNGSANG AGÜTSÜR

Mr. Temsummeren Jamir aser Mrs. Watisenla Ponger na jala Miss. **Kathyinla** EAC Noklak. 77th independence Day 2023 nung **Award of the Governor's Gold Medal** anguba atema konang nüngsang tetushi agütsür.

Tarutsü anogotem nunga maneni anema lia nü wadang nung takok moajang ta LSM-I sarasademtsür.

**Sd/-** Yashiramok Ao **President LSM**  
**Sd/-** Watitoshi **G. Secretary. LSM**

## India tsür asemteper Dutee Chand kum pezü atema nokdang



**New Delhi, Luroi/August 18 (Agencies):** Linük nung asemtepeba nung record bena alila Dutee Chand ya 'out-of-competition dope test' nung tsükba sülen kum pezü asoshi tenokdangba agütsüogo. 2021 Indian Grand Prix 4 mapang Dutee-i India tsür asoshi otsü tasen yanglua 11.17 seconds nung lai metre 100 asemteta liasü.

Iba tenokdangba ya January 3, 2023 nungi tenzüker aser sample bendenba anogo (December 5, 2022) nungi tenzüka tetoktepeba balala nung la indang results tem disqualify asütsü aser la indang medals,

points aser sempet tem meyiptsütsü, ta The Times of India nung osang ka ajanga ashi.

Iba osangkaket ajanga Anti-Doping Disciplinary Panel (ADDP) indang copy ka ngutetba nung, nokdanga aliba mozü lai chiogo ta panel temolung süa kuli ngutetaka aibelenba mesüra temolung magütsüba balaka majiteter, ta shia liasü.

Dutee-i ozüing nung aibelenba ya asaa masü ta kuli magütsütet, ta ADDP ajanga ashi.

"Item tensa ajak asadanger, item kulitem ajanga lai anti-doping rule violation (ADRV)

nung aibelenba ya asaa inyakba masü ta meshitet: 1) Lai physician den asüngdangteptsü melena physiotherapist den asüngdangtep aser lai agütsüba mozü achi. 2) Lai achiba mozü nung kechi aliar lai mereprang. 3) WADA ajanga nokdanga aliba mozütem tesüsa sangdongba lai junga mereprang," ta Chaitanya Mahajan tekolakba sür aliba ADDP ajanga ashi.

Dutee-i National Anti-Doping Agency (NADA) indang article 2.1 aser 2.2 nung aibelen... anungji NADAADR 2021 indang article 10.2.1.1 nung mela aliba ama la mezüing anentsüba anogo i.e. January 3, 2023 nungi tenzüka kum pezü atema asemtepeba nung shilem magütsü tenokdangba agütsür.

Arishi kum 26 tain Dutee ya iba totuyuba anema ken o benoka jembitsü anogo 21 lir.

Dutee ya National Anti-Doping Agency ajanga December 2022 nung anaben tendanga liasü. Nokdanga aliba anabolic steroids putetba sülen la asemtepeba nung shilem agiba nokdanga liasü.

## ISSF World Championship: Esha Singh aser Shiva Narwal nungeri gold angu

**Azerbaijan, Luroi/August 18 (Agencies):** Indian shooters Esha Singh aser Shiva Narwal nati India nunger asoshi konang bener arujang Hokulbarnü ISSF World Championship final nung Turkey madak takok ngua 10m air pistol mixed team gold nguogo.

India nunger ana yagu gold-medal match nung Turkey nunger tarep, Ilayda Tarhan aser Yusuf Dikec na madak 16-10 agi takok ngua linük indang medals tally ana kumogo.

Medals table nung India ya tang jenjang tanabuba nung gold ka aser bronze medal ka ngur lir, aser temaba jenjang nung China-i gold pongu aser bronze medal ana ngur lir.

Qualification round nung India nungeri kanga junga khateta Esha-i points 290 angu aser Narwal-i points 293 angu. Tena indang aggregate score 583 ajanga parnok qualification round nung temaba atong aser Turkey ya tanabuba jenjang nung aggregate 581 liasü.

China aser Iran ya aggregate 580 nung liasü, saka China ya "inner 10s" nung tajungba asüba

yong qualification round nung jenjang tasembuba tongtet.

Ajisüaka India nunger rifle shooter temi junga shilem magiteti 10m air rifle mixed team event indang qualification stage majangtet.

Rifle mixed team nung Mehuli Ghosh (316.0) aser Aishwary Pratap Singh Tomar (314.2) nati aggregate 630.2 nguteta qualification round nung jenjang toku buba nung tembang aser ano India nunger Ramita (313.7) aser Divyansh Singh Panwar (314.6) nati aggregate 628.3 nguteta jenjang 17 buba nung tembang.

Tematiba jenjang pezü nung alirtem dang final tongtet.

China nunger Huang Yuting aser Sheng Lihao nati aggregate score 632.7 nguteta qualification nung tematiba liasü aser iba sülen Iran (632.5), Israel (631.4) aser France (631.4) liasü.

China-i Iran madak 16-2 agi takok ngua gold angu aser France-i 17-9 agi Israel madak takok ngua bronze angu.

China-i iba tetoktepeba nung takok anguba sülen par gold medal tally pongu nung lir.

## PM SVANidhi Campaign kübok sentong...

(Tapak 2 nungi...)

1. States/Cities nung iba Scheme den SVs tem tali sendakteptsü asoshi Radio, TV, teti social media post aser danga ground level outreach inyakyim amala IEC inyakyim balala ajanga Street Vendors nem iba Scheme indang tajangzük awareness agütsütsü.

2. Teshimtet yimtittem nung SVANidhi Mahotsav/ Parivar Mela aser danga benjongbentsü ayongzüka street vendors tem yimjaki anir arutsü

asert parnok tsüingta temeimtep adokdaksütsü.

Item benjongbentsü nung Banks aser Digital Payment Aggregators (DPAs) tem jaoktsüla aser noklang nung noklang shilem digital transaction asüba streed vendors nem tetushi agütsütsüla. Scheme kübok street vendors temi takok anguba otsü tem danga street vendors den lemsatapa parnoka iba scheme agütsü ajungmesotsüla.

3. State/UT/City level nung Banks aser DPAs den lungjemer camp balala ayongzüka application tasen amshidaksütsüla, anüingdaka aliba sanction & loans agütsütsüla, SVs tsüingta digital transaction amshidaksütsüla.

4. Nükjidong yur yangji takok angutsü asoshi sentong yanglutsüla aser December 2023 tashinung takok ngutettsü asoshi senior level senden teti amentsüla.

## Ukraine combat drone ajanga central Moscow...

(Tapak 7 nungi...)

Ukraine sepaitemi Russian Black Sea Fleet indang rong tem aonung 10:55 ako meta "unmanned sea boat" amshia amaksü merang aser iba mapang rong tem ya Sevastopol nungi southwest tsütsü kilometre 237 pilar Black Sea indang southwestern tsütsü

liasü, ta defence ministry ajanga TASS news agency dang ashi.

Sevastopol ya Russia indang Black Sea fleet amenoka aliba tesem ka lir, koba Moscow-i rakzüka Crimean peninsula nung lir.

Tzüyim indang drone ya par

nükjidong matongdang Pytlivyi frigate aser Vasily Bykov patrol ship temi raksatsü, ta ministry ajanga ashi.

August 4 nü Russia indang Novorossiysk naval base nung Ukrainian sea drone kati amaksü aliba Russian warships temi meindok, ta ashi.

## Xi Jinping-i South Africa semdangtsü...

(Tapak 7 nungi...)

Russia Tir Vladimir Putin, shiba Ukraine nung 'war crimes' mechi alima dang aputsü sangdonga lir, pa tsüingdong oa medeni video ajanga shilem agütsü.

South Africa nung iba senden nung adentsü linük 69 jaoka lir aser yangji Africa nung aliba linük ajanga dena lir, aser iba tentet ulushitsü indanga jembitsü akok. Algeria, Saudi Arabia, Argentina aser Ethiopia linük temi iba tentet nung adentsü tejangraba sayuogo.

China ya United States den

meputepi aliba mapang alima nung par tashi ulushitsü meranger aser kasa tangatetba aliba linüktem memonui BRICS kibong nung adentsü pela jaoker, ta shia liasü.

Russia-ia iba telok ulushitsü molunga lir, saka Brazil-i memolunger, kechiaser telok ulushiba ajanga tashi maitba akumtsü tsübor. India telemtetba magiteti lir.

BRIC tenüing ya Goldman Sachs economist kati Brazil, Russia, India aser China ainba asoshi 2001 kum agüja liasü.

Item linük ya 2009 kum Russia nung mezüingbuba senden amen aser 2010 kum South Africa dena iba telok dang BRICS ta aja.

Alima nütsüing yongsük shilem 40 dak tema BRICS linüktem nung lir aser global economy shilem 26 shi lir.

BRICS senden nung adenba den külemi Xi ya China-Africa Leaders' Dialogue nunga South Africa Tir Cyril Ramaphosa den külemi adentsü, ta Chinese foreign ministry ajanga ashi.

## Barcelona nungi Paris-i ni onüa aoba masü: Lionel Messi



**Miami, Luroi/August 18 (Agencies):** Lionel Messi ya pa lanuwa nungi asayaba FC Barcelona nungi aoksa 2021 kum Paris Saint-Germain dangi ao, aser ibai Catalan nung pai takok jenti anguba den medemdangra teratatsüka liasü. Ajisüaka club nung senotsü tsütsü timtem aliba mechi Messi-i iba mera ya agütsüsa akum.

France yimtiba nung Messi ya janngatemabo meliasü. Tetenzüklen pa pelashishia agizük, saka fans kari pa dang mepelaba sayuba sülen kum tetenzüklen yutsü.

"Ni taoba mapang ashiba ama, ni Paris-i aoba ya ni onüa aoba masü, ni Barcelona yutsünüa yutsüba masü," ta Messi-i ashi.

Ajisüaka Messi ya Major League Soccer indang Inter Miami club nung züingsem akumba sülen janngatemala alir aser yangji pai trokben asayaba nung goal toku agütsüogo.

"Yimti aser saisapongba tsütsüa ni arishi tepiyong aliba dang nungi khenyongi balaka

nung ni litettsüla, aser ibai tasak liasü, saka tangbo yamaji masü," ta pai ashi.

PSG nungi pa talangkabo masayatsü ta ajiteta Messi ya kongi aotsü ta jembia liasü. Barcelona den tanaben lungjemtsü ama liasü saka World Cup akoksang Argentina nungba Miami-i ao.

Onoki telemtetba agiba nung ni kanga pela lir, asaya atema kisüing masü saka ozü kibong atema, onok anogoshi liyonga aoba atema, yimti nung janngatemala aliba atema, tajangshiba tasen aser nüburtemi mezüing anogo nungi kangadang balaka nung agizük, Miami nung kisüing masü," ta Messi-i ashi.

Paris nung aliba fans temi pa sapua agizükba indanga Messi-i ashi.

"Team den ni away nung anaben asaya aser nüburtemi ni kanga junga amshi. Anungji ni kanga pelar. Kü takum nung ni inyaknüba ama janngatemala inyaker aser tepela nung inyaker," ta Messi-i ashi.

## **BILEMDANGANG**

**"Nai na takotet makum tashi atara nai kodanga meinyaktettsü."**